

Asocio superflua

Estraro proponas malfondon de TEĴA

Ni ne povas neglekti, ke nia fak-asocio jam de multaj jaroj ne nur stagnas sed eĉ regresas. Spite al alvokoj kaj apelacioj niaj membroj neniel aktivis; dum la pasintaj jaroj krom en kunvenoj kadre de Universalaj Kongresoj (UK) TEĴA interesis neniun. Nombro de membroj kontinue malkreskis. Tial la estraro proponas malfondi tiun ĉi evidente superfluan asocion.

Se la membroj aprobas, tiel definitive mortos tradicia fakorganizajo, fondita en 1948 en sveda Malmö – kurioze, tiukaze lasta publika kunveno de TEĴA okazus 55 jarojn poste ankaŭ en sveda urbo, Gotenburgo, kie en 2003 okazis UK.

Dum jardekoj TEĴA estis sub gvidado de precipe bulgaraj esperantistoj, do sub forta komunisma tendenco, ĝis disfalis la orienteŭropa socialisma bloko. En 1988 aperis lasta numero de *Internacia Ĵurnalisto*, kiu ĉiam estis nur tre modesta bulteno.

Bulgaraj TEĴA-estraranoj en 1991 kontaktis min demandante, ĉu mi pretas iĝi prezidanto. Post iom da hezito mi akceptis kaj en 1991 dum UK en Bergeno, Norvegio, oni elektis min (ne ĉeestintan). Tuj poste proprainciante (kun persona kredito al TEĴA) mi revivigis la fakorganon. En 1992 kunveno (50 persona) kadre de UK en Vieno refondis la asocion kun novaj statuto,

reglamento kaj laborplano kaj kun nova estraro, kiu kun elano eklaboris. Mi daŭre redaktis la fakorganon; vicprezidantoj Paul GUBBINS kaj Aleksandro KORĴENKOV adekvate aktivis. Grava iniciato estis koresponda trejnkurso por ĵurnalistoj, gvidata de Gubbins. Krome ni organizis seminariojn kaj lanĉis TEĴA-premion „Edmond Privat“.

En 1994 TEĴA-prezidanto Stefan MAUL gvidis kurson pri komunikad-scienco en Akademio Internacia de San Marino (AIS) – tiel esperantista ĵurnalismo por la unua fojo atingis sciencan nivelon. La asocio do ŝajne prosperis, havante 130 membrojn (el kiuj tamen orienteŭropaj pagis malaltajn kotizojn). Sed iom post iom la redaktoro havis problemojn plenigi la paĝojn de la revuo, kaj en 1996 la estraron atingis alarmo de l' kasisto: nur 80 membroj pagis kotizon, la kredito estis elĉerpita, la kaso malplena, ne plu eblis aperigi la revuon. Dum membrokunveno tiujara en Prago la prezidanto proponis malfondon, argumentante: „Se fakasocio ne trovas subtenon de koncernaj fakuloj, ĝi estas superflua.“ La kunveno tamen malaprobis malfondon; la fakorgano aperu en formo de cirkulero.

Tiel okazis; kutime estis nur unu folio kaj ofte anstataŭ kvar numeroj aperis malpli multaj dum jaro. Tamen la trejnkurso daŭre bone funkciis ĝis 1999; poste an-

kaŭ ĝi stagnis, ĝis hodiaŭ. Bonŝance, pro neapero de la revuo kaj ne-aktivado la kaso repleniĝis, sed, nelaste pro preskaŭ kompleta malapero de TEĴA-sekcioj en orienta Eŭropo, membro-nombro falis al ĉ. 30 – lokaj E-klubo ofte havas pli multajn membrojn.

Membroj devas decidi

Tio vere ne pravigas ekziston de organizaĵeto kun bombasta nomo „Tutmonda Asocio“. La estraro do proponas malfondon laŭ paragrafo 8 de la statuto. Ĉar kutime dum UK ĉeestas nur tre malmultaj membroj niajn kunvenojn, kio certe validos ankaŭ por la venontjara UK en Pekino, la estraro aranĝas skriban voĉdonadon laŭ paragrafo 4.1 de la statuto.

Krome la estraro proponas kontraste al la statuto, kiu en paragrafo 8.4 diras ke post malfondo la havaĵo de la asocio transiru al UEA, ke ni donacu la restontan monon al Abonhelpa Fonduso de *Monato*, kiu en 2004 havos 25jaran jubileon. Ĉar el nunaj estraranoj nur YAMASAKI Seikō pretas daŭrigi (tamen ne fariĝi prezidanto), tiuj el vi, kiuj kontraŭas malfondon, samtempe devus deklari sin pretaj kandidati por la estraro.

Por ĉiuj supre skizitaj proponoj necesas plimulto de du trionoj de la validaj voĉdonoj. Vi trovas en via koverto koncernan voĉdonilon, kiun bonvolu resendi laŭeble rapide. Kompreneble ni informos kaj la (pagintajn) membrojn kaj la publikon pri la rezulto de la voĉdonado.

Stefan MAUL
prezidanto de TEĴA

KOLOFONO

Internacia Ĵurnalisto

cirkulero de
Tutmonda Esperantista Ĵurnali-
sta Asocio (TEĴA)
aperas maksimume 4foje jare

Redakcio: Stefan Maul, Pferseer
Str. 15, DE-86150 Augsburg,
Germanio; retadreso:
smaul86150@aol.com
Redaktofino de tiu ĉi numero: 10
nov 2003

Artikoloj signitaj prezentas la
personan opinion de l' aŭtoroj
kaj ne nepre kongruas kun la opi-
nio de l' redakcio.

Administrado: Flandra Esperan-
to-Ligo (FEL), Frankrijklei 140,
B-2000 Antwerpen, Belgio
Verantwoordelijke uitgever:
Paul Peeraerts, Frankrijklei 140,
B-2000 Antwerpen

Estraro de TEĴA:

Prezidanto: Stefan MAUL (adre-
so supre)
Vicprezidanto: Paul GUBBINS,
3 Arden Court, Mossley, Congle-
ton, Cheshire CW12 3JH, Britio;
retadreso:
100103.3317@compuserve.com
Sekretario/kasisto: YAMASAKI
Seikō, Higasi Koigakubo
3-18-12, Kokubunzi, JP-
185-0014 Tōkyō, Japanio; ret-
adreso: syama@dokkyo.ac.jp
Estrarano: vakas

Arbitracia komisiono: István
ERTL, Andrzej PETTYN,
László SZILVASI

Laborkomisiono pri trejnado de
ĵurnalistoj: estro Paul GUBBINS
(adreso supre)

Laborkomisiono de radioĵurnali-
stoj: Andrzej PETTYN

Landaj sekcioj en Bulgario, Ja-
panio, Pollando kaj Ruslando

Membrokotizo: 10 eŭroj jare
(B-landoj 2,50 EUR). Pagu al
konto teĵ-u ĉe FEL (adreso su-
pre) aŭ al UEA-konto de TEĴA:
ttmj-f.

Kasraporto

FEL-konto	(EUR)
Saldo 2002 06 30	1 668,10
(raportita en IĴ 1/2002)	
Enspezo	320,00
Saldo 2003 09 30	1 988,10

UEA-konto	
Saldo 2002 06 30	245,86
Enspezo	165,00
Elspezo	95,00
Saldo 2003 11 12	315,86

Totala bonhavo 2 303,96

Via Sekretario-Kasisto

Ne pagu!

Pro la voĉdonado pri
eventuala malfondo de nia
asocio, ni petas ne jam pagi
kotizojn por 2004. Kiel
montras la supra kasraporto,
ni disponas pri mono, kiu
sufiĉas por pagi elspezojn de
tiu ĉi kaj venonta cirkuleroj.
Bonvolu atendi de la rezulton
de la voĉdonado kaj plian
komunikon.

Ni funebras

Certe vi jam eksciis el aliaj fon-
toj, ke en majo 2003 pro akci-
dento mortis Symilde
SCHENK-LEDON kaj Gilbert
LEDON en Brazilo. Ambaŭ estis
fidelaj kaj ofte aktivaj membroj
de TEĴA, Gilbert Ledon de 2001
estis estrarano. Li krome parto-
prenis la trejnkurson de TEĴA
kaj sukcesis brile. Lia edzino
dum multaj jaroj estis redaktoro
de *La Lampiro* (San Paŭlo), li
verkis por diversaj gazetoj, pre-
cipe por *Monato*, kaj eldonis plu-
rajn librojn, el kiuj la lasta,
„Aviada Terminaro“, estas apar-
te menciinda. Ilia morto signifas
gravan perdon ne nur por nia
asocio sed por la tuta E-movado,
precipe en Brazilo.

Kunveno de TEĴA dum la Universala Kongreso en Gotenburgo

La ĉi-jara kunveno de Tut-
monda Esperantista Ĵurnalista
Asocio okazis je mardo, 29 ju-
lio 2003, dum la Universala
Kongreso en Gotenburgo.

Senkulpigis sin la prezidanto,
Stefan MAUL, kaj la vicprezi-
danto, Paul GUBBINS. Gvidis la
kunvenon YAMASAKI Seikō
(YS). Ĉeestis dudeko da perso-
noj, inter kiuj pluraj eksmembroj.
(Sed neniuj realiĝis post la kunve-
no.)

YS klarigis ke TEĴA celas pro-
tekti la interesojn de ĵurnalistoj,
kiuj en Esperantujo tamen plejof-
te estas amatoraj, ne profesiaj.
Aliĝo al asocio de profesiaj ĵur-
nalistoj ne eblas pro altega koti-
zo. Principe trifoje jare aperu bul-
teno, sed la bulteno de longa tem-
po ne plu aperis.

Roland ROTSAERT opinias ke
ĝi nepre aperu (eventuale en sim-
pla formo, sendata rete). Halina
GORECKA proponas transdoni
ĝian redaktadon al ne-estrarano.
Laŭ YS mankas materialo por la
bulteno.

Demando pri la trejnkurso

Gorecka demandas kio okazis al
la kurso kiun iam gvidis Paul
Gubbins. YS respondas ke PG
nuntempe estas profesie tro oku-
pata. Rotsaert sugestas enretigi la
kursotekstojn, por ke ili almenaŭ
estu je dispono.

Post la kunveno Dafyd ap FER-
GUS (kiu ne ĉeestis) sugestis or-
ganizon de kurso pri la komputi-
laj (enpaĝigaj) programoj kiuj
nuntempe estas uzataj/uzendaj de
ĵurnalistoj.

Roland ROTSAERT